



## COMISSÃO DE INFRAESTRUTURAS

### RELATÓRIU FISKALIZASAUN IHA REGIÃO ADMINISTRATIVA ESPECIAL OE-CUSSE – AMBENO DEZEMBRU 2020



Prepara husi:

Joaquim da Silva Xavier

SUMÁRIU:

- I. INTRODUSAUN
- II. AUTORIZASAUN
- III. KOMPOZISAUN DELEGASAUN
- IV. OBJETIVU VIZITA
- V. PROGRAMA VIZITA
- VI. KONKLUZAUN
- VII. REKOMENDASAUN
- VIII. APROVASAUN
- IX. ANEXU

## **I. INTRODUSAUN**

Komisaun E Parlamentu Nasional mak, Komisaun Permanente ne’ebé asegura iha orgânika Rejimental Parlamentu Nasional Timor-Leste, ho knar ba akompanhamentu iha âmbitu espesialidadenian, ne’ebé ligadu ho asuntuho matériasira hanesan:

- (i) Kona ba atividade lejislativa
- (ii) Kona ba kontrolu no fiskalizasaun ba actividade sira Governu nian ne’ebé hatur iha Rejimentu Parlamentu Nasional número 3 artigu 95.<sup>º</sup> no número 3 artigu 145.<sup>º</sup> Konstituisaun Repúblika Demokrática Timor-Leste, no alínea c) artigu 35.<sup>º</sup> no artigo 79.<sup>º</sup>,tamba ne’e, realizasaun ba vizita ida ne’e organiza tuir dispozisaun rejimental ne’ebé iha.

Rejimentu Parlamentu Nasional, fo Kompetênsia ba Komisaun Espesializada Permanente sira, hodi hatene tuir asuntu sira político, administrativu no apresia atu sira Governu nian;

Visita téknika ne’e enkuadra tuir Planu atividade Komisaun E nian ba tinan 2020no Planu vizita ne’e hetan aprovasaun husi deliberasaun reuniaun Komisaun loron 24 fulan novembro tinan 2020 ne’ebé defini vizita trabalhu ba RAEOA ho objetivu atu observa kondisaun jeral atividade servisu Administrasaun ligadu ho projetu sira infraestruturas inklui halibur informasaun importante kona ba progresu fíziku ba projetu sira iha RAEOA.

Informasaun Jeral RAEOA jeográficamente iha luan 817,23 km<sup>2</sup> ho tuir sensu populaun 2015 to total hamutuk 68,913. RAEOA iha postu Administrativo 4 suku 18 no aldeia 62.

## **II. AUTORIZASAUN**

Iha deliberasaun reuniaun Komisaun E ne’ebé realiza iha loron 24 fulan Novembru 2020, hodi deside vizita fiskalizasaun ba RAEOA.

## **III. KOMPOZISAUN DELEGASAUN**

Delegasaun vizita komposta husi:

1. Deputadu Abel Pires da Silva (Prezidente Komisaun)

- |  |                            |
|--|----------------------------|
| 2. Deputadu Fabião de Oliveira                       | (Vice Presidente Komisaun) |
| 3. Deputada Maria Anabela Sávio                      | (Sekretária)               |
| 4. Deputadu Luisa Taeki (Subtitui Deputadu Arão Noé) | (Membru)                   |
| 5. Deputadu Marcos Xavier                            | (Membru)                   |
| 6. Deputadu Domingos Carvalho de Araújo              | (Membru)                   |
| 7. Deputadu Mariano Fatubai Mota                     | (Membru)                   |
| 8. Deputadu Francisco David X. Carlos                | (Membru)                   |

Iha membru Komisaun 2 la partisipa iha fiskalizasaun refere ho razaun justifikadu, kompostu husi, Deputadu Adriano do Nascimento ho Deputada Irene Gonzaga Sarmento. Fiskalizasaun hetan apoiu husi ekipa tékniku, mak hanesan, Tékniku Komisaun – Joaquim da Silva Xavier ho Cesaltina Virgina, Escolto 2, Jornalista RTPN 1 ho Tékniku DIRPEC 1.

#### **IV. OBJETIVUVIZITA**

Objetivu husi vizita fiskalizasaun ba RAEOA, atu halo observasaun ba projetu kontinuasaun estrada ligasaun husi Noefefan – Sub-Rejiaun Pante Macassar ba Citrana – Sub-Rejiaun Nitibe. Além de ne'e, fiskaliza mos estrada ba postu sira ne'ebe mak tuir planu Autoridade RAEOA sei implementa iha tinan 2021.

#### **V. PROGRAMA VIZITA**

Vizita téknika ne'e tuir ajenda ne'ebe deside ona hanesan tuir mai:

1. Fiskalizasaun ba Ro'o Sucesso ho kapasidade hanesan ro'o pasanjeiru Díli ba Oe-Cusse;
2. Fiskalizasain ba estrada iha Sub-Rejiaun Oe-Silo ho uma quarantena COVID 19 iha posto Oe-Silo;
3. Reuniaun ho Presidente Autoridade RAEOA;
4. Fiskalizasaun ba estrada ligasaun Noefefan – Citrana;
5. Fiskalizasaun ba uma quarantena COVID 19 iha Postu Citrana Sub-Rejiaun Nitibe;
6. Fiskalizasaun ba uma quarantena iha Sub-Rejiaun Pante Macassar;
7. Fiskalizasaun ba Ro'o Nakroma ne'ebe ho kapasidade hanesan mos ro'o pasanjeiru Díli ba Oe-Cusse.

### **5.1. Fiskalizasaun ba Ro'o Sucesso**

Durante viajen husi Díli ba Oecusse ekipa Komisaun halo observasaun ba Ro'o Sucesso hodi nota kona ba kondisaun ro'o refere ne'ebe halo viajen ho durasaun tempu ne'ebe naruk kuaze óras 17 nia laran. Durante iha ro'o laran, delegasaun nota mos kona ba kadeira pasajeiru ne'ebe nakounu ho nati, iha ne'ebe hodi implika pasajeiru barak toba deit iha rai no la tur iha kadeira ne'ebe eziste. Tuir pasajeiru sira, kondisaun ro'o halao ema barak prefere tur nahe biti no toba iha rai duke tur iha kadeira ne'ebe prepara ona tambá kestaun nati. Para além de ne'e, Komisaun mos nota kona ba laiha preparasaun klinika movele hodi fo atendementu emergensia ba pasajeiru sira bainhira nesesáriu, liu-liu iha situasaun atual kona ba moras covid-19.

### **5.2. Fiskalizasaun estrada Bobometo-Oesilo**

Tuir observasaun Komisaun, estrada ligasaun husi Suku Bobometo ba Sub-Rejiaun Oe-Silo komesa diak ona kompara ho tempu pasadu tambá hadia liu hosi programa três dólar. Tuir planu, Autoridade sei konstroí estrada foun ligasaun Bobometo – Oe-Silo iha tinan 2021.

### **5.3. Fiskalizasaun ba uma Quarantena COVID-19**



Delegasaun Komisaun E halo fiskalizasaun ba uma Quarantena covid-19 iha Posto Oe-Silo, RAEOA, dezembru 2020. (Dok Com E 2020)

Fiskalizasaun ba quarantena covid-19 ne'ebe mak nati ma suu-regiao Oe-Silo central hodi antesipa movimentasaun sortu covid-19 husi fronteira Kefa – Indonésia. Tuir observasaun Komisaun iha terenu nota katak, uma qarantena ne'ebe ho medida 16 x 7.5 M ne'e foin mak

atinje 10% iha progresu fíziku. Obra konstrusaun kaer husi kompanhia Erihjocia Unip. Lda. ho total orsamentu \$ 115,894,74.

#### **5.4. Reuniaun ho Prezidente Autoridade RAEOA**

Iha okaziaun da-uluk Prezidente Komisaun hanesan mos xefi delegasaun halo aprezentasaun kona ba kompozisaun Komisaun ba Prezidente Autoridade foun – Senhor Arsénio Paixão Bano.

Informasaun da-uluk ne’ebé Komisaun hato’o ba Prezidente Autoridade mak kona ba kondisaun Ro’o Sucesso, ne’ebé apanha rasik husi membru komisaun sira durante vizita Díli – Oe-Cusse. Informasaun ne’ebé hato’o ba Prezidente Autoridade ho intensaun nudar konhesimentu ba Autoridade RAEOA hodi bele melhora diak liu tan planu oinsa bele fo atendimento transporte ho kualidade ba komunidade iha futuru. Ro’o sira presiza iha manutensaun adekuada no rutina kona ba mákina ho kadeira hodi fo seguransa moris, confortavél ho dignu ba pasajeiru hotu ne’ebé maioria Povu Timor-Leste. Iha biban refere Prezidente Komisaun mos hato’o kona ba Orsamentu Geral Estadu 2021 ne’ebé husi parte política rezolve ona no hein hela promulgasaun husi Prezidente Republika. Hato’o mos kona ba informasaun projetu husi RAEOA ne’ebé Komisaun simu ona iha fulan julhu tinan 2020.

Objetivu sorumetu ho Prezidente Autoridade RAEOA iha edisaun 2020, atu hare liu planu no implementasaun kona ba setor importante sira mak hanesan, be’e-mos, estrada ba área remotas no mos konstrusaun uma quarantena ne’ebé mak autoridade iha. Kona ba uma quarantena, Komisaun apoiu no motiva Prezidente Autoridade RAEOA atu nafatin esforsu finaliza konstrusaun ne’ebé Komisaun observa ona iha Sub-Rejiaun Oe-Silo foin atinji 15%. Komisaun no parte hotu espera katak iha fulan tolu mai oin bele termina ona konstrusaun refere, hodi completa fasilita pesoal saúde sira iha fronteira hodi halao sira nia servisu ho diak.

Deputadu Fabião de Oliveira – Vice-Presidente Komisaun no hanesan mos habitante Ambeno, sekunda mos katak fiskalizasaun edisaun 2020 ida ne’e importante ba Komisaun atu haré hodi halo preparasaun ne’ebé diak kona ba planu orsamentu 2021 nian, liu-liu bele aloka ba setor xavi sira hanesan estrada ho ponte ne’ebé tenki em kompletu ho estudu tekniku ho jeolójia kona ba rai, hodi nune’e konstrusaun estrada sira bele iha kualidade ba iha tempu naruk. Hato’o mos métodu ne’ebé Komisaun uza hodi fiskaliza ro’o pasajeiru 2, Nakroman ho Sucesso.

Operasionalmente, Komisaun uza ro'o ne'ebe diferente ba-mai Díli – RAEOA hodi fiskaliza direta kondisaun ro'o rua refere. Felizmente komisaun bele deteta problemas ho dezáfiu ne'ebe parte ro'o rua inrenta, liu-liu em relasaun ho klinika móvel.

Deputadu Marcos Xavier hanesan mos membru Komisaun husi bankada opozisaun, husu kona oinsa rezultadu ezekusaun OGE 2020 ne'ebe mak aloka ba RAEOA hamutuk 76 milhoes dólares Amerikanu ho nia ezekusaun ba fulan rua deit. Kona ba estrada rural, husu atu mantein ho programa três dólar hodi benefisia komunidade lokal. Presiza esplikasaun detalha kona ba total kilometru husi estrada ne'ebe RAEOA presiza orsamenta ba tinan 2021, hodi nune'e bele konvense apozisaun.



*Delegasaun halo reuniao ho Presidente Autoridade RAEOA ho nia komitiva 17 de Desembro 2020*  
*Dok. Kom E*

Deputada Lucía Taeki, membru opozisaun husi RAEOA, sekunda kona ba razaun alokasaun orsamentu 2021 ba RAEOA ho montanate \$ 76 milhoes ba atividade espesial perfurasaun be'e-mos, liu-liu husu Autoridade atu haré kona ba instalasaun be'e-mos ba iha Hospital Referal Ambeno tambá importante tebes. Kona ba estrada Pakote I ne'ebe mak termina ona, husu autoridade atu fo konsiderasaun mos ba estrada ligasaun husi merkadu Nunbei ba Eskola Tékniku Agrikultura ne'ebe seidauk rehabilita.

Presidente Komisaun – Abel Pires da Silva, apresenta mos kona ba estrada ligasaun Oe-Cuse ba Sub-Região Oe-Silo ne’ebé diak tuir abservasaun pesoal, maibe presiza kontinua ba oin no Komisaun E fo konfiansa no prontu apoiu ba RAEOA nia diak.

Hatan ba prekupasaun husi membru deputadu sira, Presidente Autoridade RAEOA - Arsénio Paixão Bano em primeiro luga hato’o agradese ba preokupasaun ho sujestaun ne’ebé sai hanesan krítika konstrutiva hodi dezenvolve RAEOA.

Kona ba orsamentu 2020, Autoridade RAEOA komenta katak kompromisiu ona besik 80%. Kona ba risku ba covid-19, iha Oe-Cusse mantein nafatin halo prevensaun tambá husi Atambua laiha redusaun no aumenta ba bebeik husi loron ba loron, inklui iha Kupang. Hanesan Autoridade, mekanismu ne’ebé hola hodi prevene surtu covid-19 iha RAEOA, kada dader konvoka enkontru kordenasaun hodi esforsu hari’i uma quarantena iha fronteira sira. Atu apoiu ba quarantena sira, parte Sekretária Regional Assunto Saúde fo apoiu halo rekrutamento ba pesoal vizilansia hamutuk ema 68 hodi halo vizilansia iha área izoladu sira hodi kontrolu vizitante ilegal no asegura ba iha quarantena.

Dadus ba quarantena sira mak hanesan tuir mai ne,e

| Nú.  | Naran Projetu                 | Fatin Projetu               | Orsamentu Previstu | Kompanhia Implantadora | Valor Orsamento |
|--|-------------------------------|-----------------------------|--------------------|------------------------|-----------------|
| Implementasaun Pakote I Projetu Covid-19 Orsamentu Tinan Fiskal 2020 |                               |                             |                    |                        |                 |
| 1.   | Kostrusaun quarantena         | Suco Costa Aldea Qiumanteco | \$181.710.98       | Tera Santa Unip. Lda.  | \$165.625.54    |
| 2.   | Konstrusaun uma pessoal saude | Nipani Sacato               | \$70.399.13        | Dinhola Unip. Lda.     | \$68.059.86     |
| 3.   | Reabilitasaun Klínika         | Nipani Sacato               | \$18.290,68        | Enclave Unip. Lda.     | \$17.517.35     |
| Implementasaun Pakote II Projeto Covid-19 Tinan Fiscal 2020          |                               |                             |                    |                        |                 |
| 4.   | Konstrusaun quarantena        | Beneufe, Nitibe             | \$120 .175.05      | Lorotias Unip.Lda.     | 109.363,69      |
| 5.   | Konstrusaun                   | Oesilo-                     | \$127.196.05       | Erihjocia              | 115,894.74      |

|       | quarantena                      | Central            |                     | Unip.Lda.                     |                      |
|-------|---------------------------------|--------------------|---------------------|-------------------------------|----------------------|
| 6.    | Konstrusaun<br>quarantena       | Pasabe-Central     | \$ 125.688.78       | Neon<br>Mantaen<br>Unip.Lda.  | \$ 114.432.04        |
| 7.    | Konstrusaun uma<br>Pesoal Saúde | Beneufe,<br>Nitibe | \$ 51, 744.12       | Hunu<br>Bahalaco<br>Unip.Lda. | \$ 47.095.28         |
| Total |                                 |                    | <b>\$695.304.82</b> |                               | <b>\$ 638.186.50</b> |

Planu kona ba uma quarantena refere, bainhira aban bainrua surtu covid-19 remata, uma sira sei utiliza ba pesoal saúde sira hodi halao knar.

Kona ba be'e-mos, Autoridade RAEOA foka makas liu ba asuntu tékniku iha proposta OGE 2020, maibe to'o adata foin mak halo lansamentu 1, enkuantu 4 hat seluk sei iha hela prosesu aprovisionamentu hein konkluzaun tama ba final. Iha mos projetu 7 kona ba perfurasaun be'e ho eskala bo'ot no mos rezerva ba be'e tanki. Kona ba asuntu refere, ba tinan oin RAEOA sei fokus ba iha distribuisaun be'e-mos ba iha komunidade sira. Atualmente, distribuisaun be'e-mos ba total ema 39 mil kada semana uza be'e-matan ida deit. Kona ba perfurasaun be'e ba iha Hospital Referal tama iha lista prioridade ba tinan.

Kona ba projetu estrada, ba estrada rural ba tinan 2021 nian iha estrada 15 mak sei implementa iha Oe-Cuse-laran no sub-rejiaun sira. Atu fasilita movimentu komunidade nian iha tinan atual, Autoridade RAEOA hola insiativa hodi koordena ho xefi suku sira hodi halo manutensaun ki'ik liu husi projetu “três dólares”, nune'e bele fasilita komunidade sira bele asesu ba estrada hodi hein pakote estrada rural ne'ebe mak sei implementa iha tinan 2021. Kona ba estrada ligasaun Merkadu Nunbei ba Eskola Téknika Agrikultura, ba tinan oin sei tama iha manutensaun, agora dadaun Autoridade monta ona pesoal limpeza iha merkadu para hodi halo limpeza loro-loron.

Ba tinan 2021, bainhira projetu bo'ot sira sedauk komesa, Autoridade RAEOA sei koordena ho parte IGE Rejional hodi ajuda komunidade sira liu-liu bele halo normalizasaun ba mota sira nune'e bele fasilita komunidade sira nia movimentu iha tempu udan.

## **5.5 Fiskalizasaun Estrada Noefefan – Citrana**

Observasaun jeral kona ba estrada ligasaun Ponte Noefefan ba Citrana iha kondisaun diak maske seidauk fui alkatraun hanesan Kapital Pante-Macassar. Óras ne’eba Autoridade RAEOA halao hela projetu “três dólares” hodi halo manutensaun ba estrada refere no sujere atu iha kontinuasaun kona ba projetu “três dólares”, atu nune’e bele fasilita komunidade lori produtu lokal ba merkadu.

## **5.6 Fiskalizasaun Konstrusaun Quarantena COVID no Fatin Pesoal Saúde iha Nitibe**

Fatin konstrusaun lokaliza iha Bairo Bitila, Aldea Manan, Suku Bene-Ufe, Sub-Rejiaun Nitibe. Uma quarantena ho medida 16M x 7,5M ho total kuartu 11, ne’eba obra kaer husi kompanhia Lorotias Unipesoal Lda, valor orsamentu \$109.363,69 no projetu refere atinje ona 10%.

Iha biban hanesan, Komisaun mos halo observasaun ba konstrusaun rezidensia pesoal saúde ne’eba lokaliza iha área Nitibe. Rezidensia ho total kuartu 4 no obra halao husi kompanhia Hunu Bahalaco Unipesoal Lda. ho total orsamentu \$47.095.28.



*Delegasaun Komisaun E bainhira halo fiskalizasaun ba Uma Quarantena Covid-19 iha Suku Bene-Ufe, Sub-RejiaunNitibe, RAEOA.(Dok.Com E, Dezembru 2020)*

## **5.7. Fiskalizasaun ba Konstrusaun Quarantena iha Pante Macassar**

Fatin konstrusaun lokaliza iha Bairo Kiumaunteko, Aldea Sanane, Suku Costa, Sub-Rejiaun Pante Macassar, RAEOA. Tuir observasaun terenu, nota katak uma quarantena iha Pante

Macassar ho medida 40M x 10M, ho total kuartu 23. Progresu fíziku agora dadaun atinje ona 25%, obra kaer husi kompanhia Tera Santa Unipesoal Lda. ho valor orsamentu \$165.625.54.



*Delegasaun Komisaun E halo fiskalizasaun ba Konstrusaun Uma Quarantena Covid-19 iha Aldea Sanane, Suku Costa, Sub-Rejiaun Pante Macasar, RAEOA. (Dok Kom E, Desembru 2020)*

## 5.8 Fiskalizasaun ba Ro'o Nakroma

Tuir observasaun komisaun, Ro'o Nakroman iha kondisaun ne'ebe diak, maibe presiza estabelese klinika móvel iha ro'o laran hodi bele halo atendementu emergensia ba pasajeiru sira bainhira hetan asidente ou moras, ou bele halo prevensaun ba surtu covid-19.

## **VI. KONKLUZAUN**

Bazeia ba deskrisaun iha leten, maka Komisaun hatoo'o konkluzaun hanesan tuir mai:

1. Infraestrutura iha Rejiaun Espesial Oe-Cusse (RAEOA) progresivamente Governo Sentral kontinua tau prioridade. Autoridade RAEOA nafatin tau planu prioridade ba setor xavi sira hanesan estrada, ponte, be'e-mos ho eletrisidade iha OGE 2021, ho objetivu atu loke dezenvolvimentu to'o iha área remotas no bele kore komunidade husi moris izoladu ho mukit iha futuru.
2. Autoridade RAEOA iha planu efetivu kona ba konstrusaun uma quarantena ho rezidensia pesoal saúde iha sub-rejiaun 4 ne'ebe eziste, ho vizaun katak wainhira Covid-19 remata uma sira sei permanense ba parte saúde regional.
3. Autoridade RAEOA kria ona mekanismu rasik hodi forma ekipa vizilansia atu bele tau-matan ba movimentu ilegal sira iha área fronterista; agora dadauk ekipa refere halo parte mos hanesan brigada fron-line hamutuk ho ekipa sira seluk hodi luta ba prevensaun covid-19 iha RAEOA em espesial no Timor-Leste en jeral.
4. Projetu estrada rural iha RAEOA iha faze manutensaun ho programa nivel báziku “três dólares”. Observa katak, projetu “três dólares” iha utilidade mutual, parte ida, insentiva komunidade bele hadian ekónomia família, liu-liu lori komunidade bele asesu ba merkadu, tos ká natar, eskola no seluk tan. Parte seluk, eduka no motiva komunidade bele partisipa ativu no sai sujetu iha prosesu dezenvolvimentu país.
5. Be'e-mos esensial ba moris no ba dezenvolvimentu meiu-ambiente nomos kontribui ba valor ekonómiku, maibe atualmente eziste suku balun mak seidauk hetan asesu ba be'e-mos, inklui Hospital Referal Ambeno. Nune'e, liu husi projetu perfurasaun be'e-mos ne'ebe mak Autoridade RAEOA projeta iha tinan 2021 bele duni benefisia ba komunidade.
6. Maioria pasajeiru ro'o, tantu Ro'o Nakroman, liu-liu Ro'o Sucesso, la uja kadeira ne'ebe mak iha tambá kadeira sira la saudavel no hakiak nati barak. Nune'e mos, ro'o 2 refere laiha klinika móvel hodi fo atendimento emergenciais ba pasajeiru sira, liu-liu partu ba inan isin-rua ho bebe.

## **VII. REKOMENDASAUN**

Bazeia ba konkluzaun iha leten, maka Komisaun hakarak hato'o rekomendasaun sira hanesan tuir mai:

1. Kontinua konsidera iha planu ho asaun kona ba espansaun projetu ZEESM ba iha sub-rejiaun sira iha RAEOA, hodi nune'e rezultadu dezenvolvimentu rejional bele benefisia ba komunidade hotu tantu iha área kapital to'o iha área rural.
2. Konstrusaun uma quarantena ho rezidensia pesoal saúde iha sub-rejiaun 4 ne'ebe eziste presiza iha garante kualidade hodi bele utiliza ba tempu naruk wainhira sortu covid-19 remata.
3. Mekanismu formasaun ekipa vizilansia iha área fronterista presiza iha hanoin adekuadu kona ba never ho direitu hosi pesoal ne'ebe hola parte direta iha ekipa refere, inklui apoiu ekipamentu protesaun hodi garanti seguransa ba an rasik no ba ema seluk iha área front-line.
4. Presiza halo manutensaun rutina ba interior ro'o pasajeiru Nakroman ho Sucesso liu-liu parte kadeira ne'ebe hakiak nati barak hodi garante confortabilidade ba pasajeiru no estabelesimentu klinika movel hodi fo atendimento emergenciais ne'ebe dignu ho akuradu ba pasajeiru sira karik moras durante iha viajen.
5. Nafatin hametin koordenasaun entre Autoridade Rejional ho autoridade suku no mos parte IGE hodi asegura facilidades estrada ho mota ba movimentasaun komunidade iha área remotas atu buka moris.
6. Reavalia no verifica rekezitu valor subsíduo sira ne'ebe atu atribui ba estrutura suku sira ho baze klasifikasiun lokalidade.

## **VIII. APROVAÇÃO.**

Relatório Fiskalizasaun iha RAEOA data 15 – 20 Dezembru 2020 hetan ona aprovasaun Komisaun, liu husi reuniaun ordinária iha loron Kuarta, 4 Marsu 2021, tuku 10:00 óras Timor Leste. Aprovasaun hetan partisipasaun husi membrus Komisaun nain 6, ho rezultadu aprovasaun: AFAVOR: NE'EN; KONTRA: ZERO; ABSTENSAUN: ZERO.

Díli, Parlamentu Nasional, 4 Marsu 2021

Prezidente Komisaun,

Relatora,

Deputadu Abel Pires da Silva, PhD

Deputada Maria Anabela Sávio